

خيمة نسب ...

حسن حاتم المذكور

((كاكه حمه : اليد الواحدة لا تصفق ... فخذ يدي ايها الأعز))

خيمة نسب

.....

الهور شايل غيـض مجـروح الجبل
بدمع صفصافه بـجت عـين النـخل
تحزم بقاريـخ عـشره ... وگال عونـك
يا جـبل دنـيانه عـشره ... ولیل دربك
هاك اخـذ چـفي عـلى چـفك
بيهن نصفـگ سويـه
بيهن نـعدل الحـمل

.....

والربابه لابسـه طـور الجـنوب
مـبخره بـريـحه نـسب
بويـه خـذني ... شايلـه بروحي عـتب
والناي فارش ريتـه
يـنـتـظر جـيتي عـشـگ
عـمره الـاف الـسنين
وبـعدـه بـعيـونه طـفل

.....

_____ کوردستان

يا جبل يا بنفي ... الهور اجه
افرش الشوگ على دربه
عمره وي عمرک مشه
بشریان تاریخ المحبه
الدنيه غابة خوف مزروعه بدربکم
ضباع من جيرانکم
مجلوبه جوع
انيابهم مشتھيه دمکم

.....

يا جنوب الما نسيته ... وما نسه اخته
البس التاريخ جيه ...
مرن سنین الحزن
والفرح ينتظر جيتك
ها كثر مرت عساكر ... فوگ جرحي
والآخ .. ما گالتهه اختك
حتى لا نزرع قضيه
وتكبر حلوگ الشماته
هاك اخذ چفي على چفك
بيهن نصفگ سويه
وبيهن نعدل الحمل

.....
_____ الجنوب

ياختي عاتبني الوكت

تاريخنه ينشد علينه

وخاطره مكسور بينه

ذوله غربه

باگوا البيدر ... وباعونه سبوس دنانهم

سلبوا سترنه ... ولبسونه اسمالهم

ذوله من ذولاك موت

واحنه اكبر من جرحنه

وأكبر من الموت صرنه

جيت يختي

شايل الدنيه صواني

نجومنه بيهه وسمانه

وگمر بيهه

گاعنه بيهه وشمسنه

گومي ياختي

شگگي سمال العلينه

وخيطي تاريخ النسب

مطرز بلون الهويه

البيهه نهرين وجبل

بيهه صفصاف ونخل

وحروف من تاريخه
ينكتب بقلم اهلنه
ولا يظل مكتوب بقلم الغرب
گومي نبني بيوتنه
بين باب وباب تتمشه السوالف
والربابه لابسه طور الجوب
مبخره بريحة نسب
بروحه ساكن عشگ
عمره الاف السنين
وشوگه بعيونه طفل
.....

_____ الجميع

تعالوا نزرع الخوه
ونحصد فرح لمتنه
نگل للجار ذوله احنه
گمر للتايه بليله
وشمس للچانوا اخوتنه
بسوگ الرخص باعونه
وشربوا دمع بيدرنه
مر المر ... وتعدده الجان
وبگينه احنه
خلگنه شما يطول ... نگول ذوله احنه

على شفاف الوكت ضحكن سالفنه

ربيع وفرحته نيروز

ونسمة فرح بالريه

كرهنه ريحة البارود

عطشانين جية عيد

بيه الوطن عيديه

وطن بينه ... وبيه احنه

بسوگ الرخص لوباعوه

نغليه ونكل للغرب هذا انه

خيمة نسب ...

نلتم بيه ... ويلمنه

2010 / 05 / 03

Hbss444@yahoo.de

